



Sabtu, 16 Desember 2023

Ogen: Miha 1:10-16



Iendesken Tuhan Kempak Musuh



Ergiah-giah kal ukur i bas nuriken berita kesangapen bage pe kinijuah-juahen man kalak sideban. Berita e erbahanca kurang meter si akap ipeseh pe. Tapi kune berita si man pesehenken e berita kecedan, kebenen, peturah perbeben man si mabasa, rukur nge kita uga ndia cara si payo mpesehsa segelah la maba pinakit ras kecedan ate man si megi-megi. Maun erkiteken perukuren si bage erbahanca mbue si la pang nuriken berita kecedan e.

Miha sekalak nabi, si arus mpeseh berita ceda ate. Ipandangna bangsa Juda si la ncidahken ngeluh sentudu ras sura-sura Dibata. Ngelakoken dahin si encurnaken gelar Dibata arah nembah man dibata-dibata sideban. E maka si e ngerehken rawa Dibata. iukum me bangsa Juda e. Ipake Dibata bangsa sideban guna nabansa pe. Iendesken Tuhan me ia kempak musuhna, seh maka ikuasai musuh e me ia. Melala peminpin-peminpin si sedekah enda niakap mulia dengen erkuasa pe kiam cebuni erkiteken kebiaren. Anak-anak si pebelin ndube pe ibuat bas bangsa Juda nari janah iendesken man musuh-musuh bangsa e. Andiko, tuhu seh kal cedana berita e. Bage me berita e isehken Miha man bangsa juda segelah banci mulih kempak Dibata.

Senina Moria, Dibatanta e si Mada Kuasa, la lit sada pe i bas doni enda bage pe i babo doni enda ngasup bagi IA. Kai pe banci ibahanNa. Bagi silakokenNa nandagi bangsa Juda maka musuh bangsa enda pe ipake segelah turah pengejapenna kerna kinimbisan Dibata. Iendesken kempak musuh, oratna jadi dalam jera dengen mulihken kempak Dibata.

Bas kegeluhenta, tetap rembaklah ras Dibata, metenget nandangi persinget Dibata. Kai pe banci ipake Dibata guna maba kiniulin man banta. Banci saja arah musuh si lit jadi dalanta ngidah kuasaNa. E maka ola sempat bagi bangsa Juda ndatken ukumen Dibata arah musuhna nari maka jera, tapi kune si begi berita kerna dosa-dosanta, sadar janah minterlah mindo pengalemi dosa.



